

Bosna i Hercegovina
Federacija Bosne i Hercegovine
Hercegovačko-neretvanski kanton
SKUPŠTINA
Broj: **02-02-060/22**
Mostar, 18.03.2022. godine

IZVOD IZ ZAPISNIKA
sa sedamnaeste (XVII) redovne sjednice Skupštine
Hercegovačko-neretvanskog kantona

Sjednica je održana dana 18.03.2022. godine u sali Centra za kulturu u Mostaru sa početkom rada u 13:00 sati

Sjednicu je otvorio Šerif Špago, predsjedavajući Skupštine Hercegovačko-neretvanskog kantona.

Sekretar Skupštine, Željka Čule, obavila je prozivku.

Prisutni: Marija Bešker, Slavko Bilić, Marija Bošković, Stana Burić, Damir Džeba, Elvedin Grcić, Dejan Kvesić, Julineta Jurić, Tomislav Martinović, Ivan Odak, Andrea Pehar, Milica Pehar, Amir Šelo, Šerif Špago, Minela Krpo, Nermin Vrtić, Aner Žuljević, Iva Raguž, Vesna Saradžić, Selma Drljević, Đuro Prkačin, Edis Džino, Slaven Raguž, Irma Memidžan, Vera Konjevod, Zora Dujmović, Alisa Hajdarović i Mejrima Hasić.

Odsutni: Ismet Lulić i Ajdin Teletović.

Konstatovano je da je na sjednici prisutno **28** poslanika, te da postoji kvorum za rad i punovažno odlučivanje.

Prisutni po pozivu: predstavnici Vlade, predstavnici međunarodnih organizacija i predstavnici sredstava javnog informisanja.

Sjednica je javna, snimana je i snimci su sastavni dio ovog Izvoda iz zapisnika.

Predsjedavajući Skupštine obavijestio je poslanike da je u materijalima dostavljen prijedlog dnevnog reda koji je utvrdio Kolegij Skupštine.

Otvorena je rasprava po prijedlogu dnevnoga reda.

U raspravi nije nitko učestvovao.

Obavljeno je glasanje po prijedlogu dnevnog reda.

Nakon glasanja konstatovano je da je jednoglasno usvojen dnevni red sedamnaeste (XVII) redovne sjednice Skupštine HNK.

Usvojeni Dnevni red:

1. **Poslanička pitanja;**
2. **Program rada Skupštine HNK-a za 2022. godinu;**
3. **Izjašnjavanje o Prijedlogu Zakona o izmjenama i dopunama Zakona o turističkim zajednicama i unaprjeđenju turizma u HNK-a;**
4. **Nacrt Zakona o izmjenama i dopunama Zakona o porezu na promet nekretnina HNK-a (predlagač Amir Šelo);**
5. **Nacrt Zakona o izmjenama i dopunama Zakona o bibliotekarskoj djelatnosti HNK-a (predlagač Julineta Jurić);**
6. **Prijedlog Strategije ruralnog razvoja HNK-a za period 2021. - 2027. godina;**
7. **Prijedlog zaključaka o stanju u zdravstvu u HNK-a i realizaciji zaključaka Skupštine HNK-a od 15.12.2015. godine;**
8. **Informacija Ministarstva privrede o realizaciji zaključenih ugovora o koncesijama za 2020. godinu;**
9. **Informacija Ministarstva poljoprivrede, šumarstva i vodoprivrede o realizaciji dodijeljenih koncesija i ugovora o zakupu za korištenje poljoprivrednog zemljišta u državnom vlasništvu na području HNK-a, zaključno sa 31.12.2020. godine;**
10. **Informacija Ministarstva poljoprivrede, šumarstva i vodoprivrede o realizaciji potpisanih ugovora o koncesijama iz oblasti vodoprivrede, zaključno sa 31.12.2020. godine;**
11. **Odluka o potvrđivanju imenovanja kantonalnog javnog pravobranioca HNK-a**
12. **Odluka o potvrđivanju imenovanja zamjenika kantonalnog javnog pravobranioca u kantonalnom javnom pravobranilaštvu HNK-a;**

Uz tehničke ispravke jednoglasno su usvojeni i zapisnici sa XI. vanredne i XII. vanredne sjednice Skupštine HNK.

AD 1. Poslanička pitanja

Julineta Jurić:

Sve vas zajedno pozdravljam. Za današnju sjednicu skupštine imam inicijativu Zavodu za javno zdravstvo HNŽ-a, inicijativa je registar za rak. Registrom za rak prikupljaju se podaci o oboljelim osobama i značajkama samog tumora kako bi se mjerio javno zdravstveni teret zloćudnih bolesti. Rak je u razvijenim zemljama drugi uzrok smrti, odmah iza kardiovaskularnih bolesti. Podatke o incidenciji i pojavi novih slučajeva i mortalitetu smrtnosti od raka prikuplja registar za rak koji djeluje u sklopu Zavoda za javno zdravstvo. Podaci se redovito objavljuju te se javno dostupni. Za podatke registra za rak najviše se zna zbog njihova potencijala, upisivanja incidencije raka, preživljavanja i prevalencije u nacionalnim i međunarodnim okvirima. Često se za usporedbu rabe mortalitetni podaci, posebice stoga što su dostupniji za mnogo više zemalja nego podaci o morbiditetu. Ispitivanja incidencije raka u svijetu daju spoznaje o etiologiji raka na primjer putem opažanja razlika incidencije između pojedinih područja. U epidemiološkim istraživanjima registar za rak koristi za korelacijske studije za identifikaciju slučajeva u case-control studijima za definiranje kohortijel krajnje točke praćenja kohorte. Zbog povezivanja podatka na nivou osobe registri su korisni za područje genetičke epidemiologije. Vrlo je važno raspolagat odgovarajućim podacima koji će pomoć u izradi strategije za prevenciju i odgovarajuću onkološku službu i zaštitu. Samo dobro organizirana registracija raka može omogućiti dobivanje takvih podataka. Postoje dva osnovna pristupa razvoju registra za rak, a to su, jačanje kapaciteta za pasivno zaprimanje i obradu unaprijed popunjenih podataka od strane liječnika u zdravstvenim ustanovama i jačanje

kapaciteta na samom registru za rak uz aktivno šifriranje temeljem sirovih podataka učinjenim dostupnim kroz odgovarajuća informatička rješenja.

Zaključno. Registri za rak su važan javno-zdravstveni alat za poboljšanje zdravlja populacije. Kroz detalje podatke o značajkama ljudi koji oboljevaju od pojedine vrste raka izvor su podataka za istraživanja o etiologiji pojedinih tipova raka. Geografska distribucija pojedinih vrsta raka u kombinaciji sa podacima o izloženosti sa rizičnim čimbenicima može ukazati na prioritete u javno-zdravstvenim akcijama na nekom području, a prognostički podaci poput distribucije stadija prilikom otkrivanja raka i petogodišnjeg preživljavanja nam govore o razini sekundarne i tercijarne prevencije. Razvojem skupa podataka koji se prikupljaju o pojedinom bolesniku i njegovoj bolesti korištenjem modernih informacijskih tehnologija moguće je pratiti detaljnije pokazatelje i prediktore ishoda liječenja u različitim populacijama. Zato budimo prva županija koja će donijeti registar za rak.

I druga inicijativa, isto ide Zavodu za javno zdravstvo HNŽ-a, i Ministarstvu zdravstva, rada i socijalne skrbi HNŽ-a i Ministarstvu prosvjete, znanosti, kulture i športa HNŽ-a, inicijativa za poboljšanje načina prehrane učenika u školama, te poboljšanje i razvoj pravilnih prehrambenih navika kod mladih i djece. Prekomjerna tjelesna težina je sve očitiji javno zdravstveni problem kako u BiH tako i diljem svijeta, bitno utječe na kvalitetu i duljinu života te predstavlja čimbenik rizika za razvoj niza kroničnih nezaraznih bolesti poput šećerne bolesti tip 2, karcinoma, bolesti srca i krvnih žila. Poznato je kako na neke čimbenike rizika za zdravlje ne možemo utjecati, dob i nasljedne bolesti, međutim na promjenjive čimbenike rizika poput nepravilne prehrane i nedostatka tjelesne aktivnosti uvelike možemo utjecati i na taj način bitno umanjiti epidemiju gojaznosti. Porazna je činjenica kako se u našoj zemlji gotovo ne provode istraživanja koja bi tretirala probleme gojaznosti kod djece, posebice školske dobi, veoma je teško dobiti detaljne podatke na državnoj razini i usporediti ih prema spolu ili dobi djece. Podaci iz knjige pretilosti i posturalni status djece osnovnoškolskog uzrasta u gradu Mostaru iz 2017. godine autora izvanrednog profesora doktora Ekrema Čolakhodžića i magistra edukacijske znanosti iz područja kineziologije Nedžada Vuka i njihovih suradnika pokazuju kako je 19% djece imalo prekomjernu tjelesnu masu, a 17,4% je bilo pretilo. To znači kako je više od trećine ispitanika tada imalo tjelesnu masu iznad referentnih krivulja prema spolu i dobi. Primjetno je kako je pretilost u većoj mjeri bila zastupljena kod djevojčica 38,5% u odnosu na dječake 34,4%, a nažalost ni na državnoj ni na entitetskoj razini zasad nema izrađene strategije sa jasno naznačenim normativima za prehranu u školama. Među ostalim to je jedan od razloga što naši učenici od najranije dobi ne usvajaju pravilne prehrambene navike. Smatram kako je veoma bitno da jedan važan obrok kojeg učenici konzumiraju tijekom vremena provedenog u školi bude pomno isplaniran te nutritivno bogat i zdrav. Poznavanje sustava prehrane, namirnica koje konzumiramo, te stavova i ponašanja djece školske dobi od velikog je značaja za podizanje kvalitete života. Usvajanje zdravih prehrambenih navika dugotrajno utječe na podizanje razine zdravlja naše djece školske dobi. Riječ je o kontinuiranom procesu u kojem sudjeluju svi bitni čimbenici, a uloga obitelji je ovdje presudna. Upravo je uloga roditelja u otklanjanju ovog problema od presudne važnosti. Prvi korak u usvajanju zdravih prehrambenih navika djece djeca nose iz svoga doma. Svakako tijekom njihovog odgoja i obrazovanja treba u čitavi proces uključiti i struku, tek ćemo tada imati dobre pokazatelje i puno bolju sliku, odnosno vitalnije i zdravije mlade ljude. Ovom inicijativom predlažem utemeljenje radne skupine koja bi se sastojala od predstavnika obrazovnih i zdravstvenih institucija, magistre nutricionizma i kuhare koji pripremaju obroke za učenike u školama i djecu koja borave u produženom boravku, izradu strategije za promjenu prehrambenih navika djece u osnovnim i srednjim školama, izradu pravilnika za unaprjeđenje prehrambenih navika djece u osnovnim i srednjim školama, izradu i provedbu aktivnosti čiji je cilj povećanje razine znanja i svijesti o zdravoj prehrani i zdravim školskim užinama, izradu edukativnih sadržaja, video materijala, brošura, vježbanke za djecu, edukacija nastavnika i roditelja o važnosti pravilne prehrane i zdravih školskih obroka,

prenamjenu samouslužnih aparata koji sadrže sokove, slatkiše i grickalice u nutritivno bogate i zdrave namirnice. Hvala.

Stana Burić:

Drage kolege sve vas lijepo pozdravljam, kao i ministre i premijera. Ja imam samo jedan kratki prijedlog, zapravo prijedlog. Mi svi znamo koja je sad inflacija i koliko su poskupjele osnovne životne namirnice, a imamo ljudi za koje smo mi ovdje izglasali da njihova mjesečna primanja iz proračuna budu 150 KM, moj je prijedlog da Vlada podigne taj iznos najmanje na 250 KM, eto čisto da ljudi imaju od čega preživljavat. Ovo je više molba i zahtjev i prijedlog zastupnika da se malo bolje brinemo o onim najsiromašnijim. Pozdrav.

Slaven Raguz:

Poštovanje. Sve vas najsrdačnije pozdravljam. Ja imam dva zastupnička pitanja i jednu inicijativu. Prvo zastupničko pitanje, gospodinu Željku Laketiću, koji poslovni subjekti su bili predmetima inspeksijskog nadzora inspektorata za obrt, kao i ostalih organizacijskih jedinica koje se bave tržišnom inspekcijom u periodu od 01.01.2021. do danas? I molim da mi se u odgovoru naznače rezultati inspeksijskog nadzora. A zašto ovo pitam? Sukladno članku 131 Zakona o organizaciji uprave inspektor je obavezan izvršiti inspeksijski nadzor, sačiniti zapisnik, poduzeti odgovarajuće mjere i o tome pismeno obavijestiti podnositelja zahtjeva, odnosno inicijative, u roku od 15 dana od dana prijema. Meni se javilo cijeli niz građana koji su uputili zahtjev za inspeksijski nadzor, nisu dobili nikakvo izvješće, a kamoli zapisnik o izvršenom inspeksijskom nadzoru, pa sam ja i ja tamo početkom godine uputio jedan zahtjev i još uvijek nisam dobio odgovor, pa me zanima jeli radi uopće itko u ovoj županiji tržišnu inspekciju, odnosno inspekciju za obrt?

Drugo zastupničko pitanje, gospodinu Slađanu Bevandi, koja je nacionalna struktura uposlenih u PS Mostar Centar? Članak 4 Zakona o policijskim službenicima BiH propisuje da struktura policijskih službenika u policijskim tijelima uopće odražava nacionalnu strukturu stanovništva BiH prema popisu iz 1991., a članak 2 Zakona o državnoj službi u institucijama BiH propisuje da struktura državnih službenika u državnoj službi okvirno održava nacionalnu strukturu stanovništva BiH, pa mi je potrebna informacija o strukturi uposlenih u PS Mostar Centar.

I inicijativa, Vladi HNŽ-a, da u hitnom postupku usvoji zakon o uporabi znakovnog jezika u HNŽ-u, čiji je nacrt prihvaćen od strane Skupštine, pazite sad 30.03.2014. godine zaključkom 0201 od 30.03.2014. godine. Dakle, meni se obratila udruga „Sluh“ sa zahtjevom da uputim ja na svoju inicijativu ovaj prijedlog zakona, onda sam vidio da je nacrt usvojen 30.03.2014. 26.11.2015., dakle godinu i 8 mjeseci nakon usvajanja nacrta ministarstvo pravosuđa upućuje vladi prijedlog zakona na usvajanje. 06.12.2016., dakle dvije godine i 9 mjeseci od prihvaćanja nacrta i godinu i mjesec dana od upućivanja prijedloga od strane ministarstva vraća se zakon u cilju utvrđivanja financijske primjene i provođenja zakona. 19.12.2016. ministarstvo pravosuđa upućuje dopis ministarstvu zdravstva, ministarstvu obrazovanja i svim jedinicama lokalne samouprave procjenu financijske provedbe, 30.01.2017. samo ministarstvo zdravstva odgovara kako nisu u stanju odraditi ne znam iz kojih razloga financijsku procjenu sredstava, da bi 18.03.2022., 8 godina, evo još 12 dana pa će 8 godina od nacrta, dakle ne usvaja se prijedlog zakona o uporabi znakovnog jezika u HNŽ-u. Dakle, očigledno se radi o šutnji uprave, odnosno diskriminaciji gluhih i nagluhih osoba, pa sam dao taj tok od 3 mjeseca da se po hitnom postupku usvoji zakon, odnosno nacrt koji je već Skupština usvojila od strane Vlade, ili ćemo pokrenuti tužbu protiv za diskriminaciju sukladno članku 2 Zakona o zabrani diskriminacije u BiH, kojeg ću ponoviti kad bude Šelo predstavljao svoj prijedlog zakona, zna on o čemu govorim. Dakle, sramotno je da se 8 godina diskriminiraju ovi ljudi, da 8 godina oni traže svoja

prava, da je Skupština usvojila nacrt, a Vlada ne poštuje odluku Skupštine, dakle 8 godina, pa mislim da se jedino duže Izborni zakon dogovora!? Zahvaljujem.

Aner Žuljević:

Dobar dan svima. Zahvaljujem predsjedniče, pošto se prvi put javljam. Imam pitanje prema resornom ministarstvu obrazovanja. Dali je nakon javnog saznanja iz medija o pravomoćnoj presudi direktoru Osnovne škole Mujaga „Komadina“, u kojem je javno objavljena presuda kantonalnog suda gdje se kaže da je citiram „direktor osnovne škole osuđen na uslovnu kaznu od 10 mjeseci zato što je svjesno svojim potpisom ovjerio službenu ispravu kojom je krivotvorio podatke o radnom iskustvu N.N. gospodina u Vladi Federacije, poduzelo ikakve aktivnosti po pitanju smjene dotičnog gospodina s obzirom da se radi o presedanu da mi u obrazovnom sistemu nakon presude pravomoćne kantonalnog suda direktora koji je dokazano falsificirao dokument ostavljamo i na takav način postane primjer djeci da se te stvari mogu nekažnjeno dešavati kada je u pitanju naš obrazovni sistem!? Ja očekujem detaljnu informaciju ministra i nadam se da ću dobiti informaciju da su poduzete sve one zakonom predviđene mogućnosti o povlačenju saglasnosti i imenovanja v.d. preko postojećeg školskog odbora i da na taj način otklonimo tu sramotu koja traje od 7. mjeseca 2021. godine kada je presuda suda praktično objavljena.

Drugo moje pitanje ide, odnosno zahtjev prema Agenciji za privatizaciju. Mi smo svjedoci da danas zasjedamo 100 metara zračne linije od hotela koji gotovo 10 godina nije u stanju da se dovrši i postane funkcionalan objekat u proširenoj turističkoj ponudi grada Mostara i našeg kantona. Različite su špekulacije o stanju generalno ugovora o privatizaciji i svih obaveza koje je investitor trebao da realizuje i ja tražim od Agencije za privatizaciju da mi dostavi informaciju dali postojeći investitor ima ikakav ugovor sa institucijama kantona koji su nadležni za proces privatizacije, dali je taj ugovor važeći, ako postoji ikakav ugovor dali su ispunjene obaveze po tom ugovoru, ako nisu zašto se ne poduzima zakonom predviđena aktivnost o raskidu ugovora sa investitorom i u novom procesu privatizacije sa okolnostima koje imamo ja mislim da postoji značajan broj investitora koji bi ovaj objekat u ovakvom stanju u novom procesu privatizacije otkupio i završio, a ne da mi imamo takav objekat da kao spomenik i dalje neuspješnim privatizacijama u centru grada. Znači da podvučem i da razjasnim, od Agencije za privatizaciju tražim status kantona spram investitora oko dovršetka objekta, da mi jasno kaže koje su trenutno zakonske mogućnosti da mi izađemo iz ove pozicije da se objekat ne završava godinama. Zahvaljujem.

Milica Pehar:

Zahvaljujem. I pozdravljam sve nazočne. Ovo je moja inicijativa zajedno sa kolegicom Ivom Raguž, nastala je na osnovu zahtjeva mladih, pa riječ je o sljedećem, a predmet je inicijativa za izradu strategije mladih. Obrazloženje. Vlada HNŽ-a se u strategiji razvitka HNŽ-a za razdoblje 2021.-2027. godina kroz strateške fokuse i ciljeve jasno opredijelila, a ova Skupština usvojila, za razvoj suvremene i prosperitetne zajednice kao zaloga napretka društva u cjelini. Za ostvarenje cilja organizacije i modernog društva potrebno je donijeti i strategiju mladih, kako bi oni kao najproduktivniji nositelji modernog društva u budućnosti mogli početi samostalan život, zasnovati obitelj, te svojim radom i zalaganjem doprinijeti ostvarenju svih onih zacrtanih strateških ciljeva. Želim samo napomenuti, imamo i inicijativa i u strateškim ciljevima su navedeni, ustvari kroz ove fokuse i ciljeve načini kako bi se to moglo riješiti, međutim smatram da je potrebno osnovati tijelo na čelu sa ekspertima, ali uključiti i razmišljanje i promišljanje mladih, kako bi se to našlo na jednom mjestu i kako bi i njima bilo jasnije u kojem smjeru sve ovo ide jer nekima je možda jasno, ali ima i onih koji možda na osnovu toga mogu izabrati put kojim će oni krenuti dalje. Hvala lijepa.

Selma Drljević-Sefić:

Pozdravljam sve prisutne. Ja podnosim inicijativu prema Vladi HNK-a, da se oformi komisija ispred kantona koja će vršiti pregovore sa predstavnicima grada Mostara oko podjele obaveza pri preuzetom osnivačkim pravima za Narodno pozorište u Mostaru. Naime, HNK-a i grad Mostar su preuzeli osnivačka prava u udjelu od 50%, ali nisu definisali koje obaveze preuzimaju, te je načelnik Odjela za društvene djelatnosti grada Mostara uputio prijedlog za pregovore prema Ministarstvu obrazovanja, odakle je dobio informaciju da ispred tog odjela nema nikako pregovaračkog tima, te da nije nikako oformljen. S obzirom da je sve ostalo na tome, ja upućujem ovu inicijativu da se pokrene ovaj problem kako bi se ova godina mogla iskoristiti da se timovi mogu dogovoriti da Narodno pozorište napokon pređe na budžet. Toliko. Hvala.

Vesna Saradžić:

Hvala predsjedavajući. Ja imam jedno poslaničko pitanje i jednu inicijativu. Poslaničko pitanje upućujem Zavodu zdravstvenog osiguranja HNK-a. Način nabavke ortopedskih i drugih pomagala koja se mogu propisati u okviru obaveznog zdravstvenog osiguranja do danas je podrazumijevalo sljedeću proceduru, svako dvije godine porodični ljekar napiše dijagnozu korisnika i prosljedi Zavodu zdravstvenog osiguranja, korisnik dobije potvrdu na iznos od 1.300 KM, sa istim iznosom učestvuje i Ministarstvo za boračka pitanja HNK-a, međutim Zavod zdravstvenog osiguranja više ne izdaje potvrdu već navedeni iznos refundira ukoliko zahtjev korisnika dobije saglasnost komisije. Pitanje glasi: s obzirom na navedeni, a ne mali iznos, postavlja se pitanje kako uopšte korisnik da započne proceduru? Ako je na osnovu potvrde izdate od Zavoda zdravstvenog osiguranja Ministarstvo za boračka pitanja učestvovalo u nabavci ortopedskog pomagala, na koji način će to raditi ubuduće? Zatim zašto se uvodi vještačenje komisije i zašto je ukinuto pravo nabavke silikonskog uloška sa adapterom na koji su invalidne osobe imale pravo svake godine, u iznosu od 800 KM je učestvovao Zavod zdravstvenog osiguranja, a isto toliko Ministarstvo za boračka pitanja?

Ovim putem upućujemo inicijativu za uvođenje porodične naknade u HNK-a u iznosu od najmanje jedne prosječne plate 1.000 KM za prethodnu godinu u F BiH-a za sve zaposlene žene-majke i utvrđivanje novčane pomoći za sve nezaposlene žene-majke sa prebivalištem na području HNK-a u istom iznosu u trajanju godinu dana nakon rođenja djeteta, 12 mjeseci. Zadužuje se Vlada HNK-a da pripremi izmjene Zakona o zaštiti obitelji s djecom HNK-a, odnosno uskladi član 24, član 25, član 26, član 27, član 28, član 29, član 30, član 31 i član 32 kojim će se osigurati pripadajuća primanja na način da ona ne mogu biti niža od jedne prosječne plate za prethodnu godinu u F BiH-a, što znači 1.000 KM. Od Vlade HNK-a tražimo da hitno osigura novčana sredstva i provede sve druge potrebne radnje za implementaciju ove inicijative. Obrazloženje. Porodične naknade i primanja žena porodilja u BiH u drastičnom su nesrazmjeru s obzirom na mjesto prebivališta i radno pravni status, što je u svakom slučaju nedopustivo i nepravedno. BiH, a ni F BiH nemaju zakon koji reguliše ovu materiju, međutim nedavnim usvajanjem ovakvih odredbi u kantonu Sarajevo i najavom uvođenja istih prava u Tuzlanskom kantonu, nesrazmjer u korištenju ovih prava drastično će se povećati. Smatramo da su prava porodilja u HNK-u diskriminirajuća u odnosu na prava porodilja u drugim sredinama, što je u svakom slučaju nedopustivo. Primjenom predloženih izmjena Zakona o zaštiti porodice s djecom u HNK-a ta bi se diskriminacija uklonila i uskladila sa pravima u ostalim kantonima. Hvala.

Alisa Hajdarović:

Zahvaljujem predsjedavajući. Pozdravljam sve kolegice i kolege zastupnice i zastupnike, članove Vlade. Imam dvije inicijative. Jedna inicijativa Zavodu zdravstvenog osiguranja HNK-a, za dopunu pravilnika o sufinansiranju troškova liječenja, nabavke lijekova i medicinskih sredstava iz grupe bolesti za koje se odobrava sufinansiranje lijekova i medicinskih sredstava sufinansiranjem nabavke INOFOLIC HP osobama oboljelim od inzulinske rezistencije. Obrazloženje. Inzulinska rezistencija je stanje u kojem inzulina ima dovoljno u organizmu, ali on ne radi ili radi smanjeno. To dovodi do razvoja predijabetesa, a zatim i šećerne bolesti tipa 2. Dalje u pojašnjenju stoji šta je inzulin, neću to da vas ne opterećujem, INOFOLIC HP-e je prvi i jedini originalni proizvod efikasan u tretmanu inzulinske rezistencije, INOFOLIC HP-e je poboljšao kvalitet života milijona ljudi širom svijeta, pozitivni efekti primjene INOFOLIC HP-e se mogu očekivati unutar prva tri mjeseca od početka terapije, a za postizanje optimalnih efekata preporučuje se primjena u trajanju od minimum 6 mjeseci. Uvrštavanjem INOFOLIC HP-a u pravilnik o sufinansiranju troškova liječenja, nabavke lijekova i medicinskih sredstava, bi se olakšalo oboljelim od inzulinske rezistencije lakša nabavka ovih lijekova. Zbog njegove cijene mnogi oboljeli nažalost nisu u mogućnosti priuštiti navedenu terapiju. Dugoročno gledano držanjem pod kontrolom inzulinske rezistencije, a što se postiže korištenjem navedene terapije, smanjuje se rizik od oboljenja dijabetesa tipa 2, a samim tim i troškova za liječenje od dijabetesa tipa 2 koji su na teret Zavoda zdravstvenog osiguranja HNK-a.

Druga inicijativa je Ministarstvu unutrašnjih poslova HNK-a, da privremeno obustavi kažnjavanje parkiranja na jednoj strani trotoara u naselju Luka, potez Šarića džamija-Lučki most. U razgovoru sa stanovnicima naselja Luka upoznata sam sa problemom parkiranja u ovom naselju. Obzirom da je problem parkiranja na nivou grada oni su se zahtjevima i prijedlozima obratili Gradskoj upravi Grada Mostara, odnosno Zavodu za prostorno uređenje. U međuvremenu dok grad riješi taj problem tražimo od MUP-a HNK-a da privremeno obustavi kažnjavanje parkiranja na jednoj strani trotoara u naselju Luka, potez Šarića džamija-Lučki most, kao što je to bilo i do sada. Naime, u naselju Luka u navedenom dijelu ne postoje označena parkirna mjesta i automobili se mogu parkirati isključivo na trotoar. Rješenjem Odjela za privredu, komunalne i inspeksijske poslove, Službe za inspeksijske poslove, od 2008. godine, dozvoljena su privremena parkiranja po određenim uslovima. To je bila ustaljena praksa prethodnih godina uz dogovor sa MUP-om da se jedna strana ulice ostavi isključivo pješacima, međutim sa uvođenjem naplate parkiranja i akcijom MUP-a s tim u vezi oni nemaju vozila gdje ostaviti osim u naselja kilometar i više daleko od svojih domova. Napominjem da se ovim ne čini nikakva šteta prema preduzeću Mo-parking jer na tom potezu nema označenih parking mjesta. Zahvaljujem

AD 2. Program rada Skupštine HNK-a za 2022. godinu

Obrazloženje je dao Tomislav Martinović, zamjenik predsjedavajućeg Skupštine HNK.

Otvorena je rasprava.

U raspravi su učestvovali: Aner Žuljević i Šerif Špago.

Obavljeno je glasanje.

Većinom glasova „Za, uz 2 „Protiv“ i 1 „Suzdržan“ glas usvojen je Program rada Skupštine HNK za 2022. godinu.

AD 3. Izjašnjavanje o Prijedlogu Zakona o izmjenama i dopunama Zakona o turističkim zajednicama i unaprjeđenju turizma u HNK-a

Predsjedavajući Skupštine HNK obavijestio je zastupnike da Klub SDA traži kraću pauzu kako bi se Klub iskonzultovao za tekst predloženih amandmana odnosno za izjašnjenje predlagača ovog Zakona.

Usljedila je pauza od 15 minuta.

Nakon pauze otvorena je rasprava.

U raspravi su učestvovali: Elvedin Grečić, Tomislav Martinović, Amir Šelo i Šerif Špago.

Ispred Kluba SDA obrazloženje je dao zastupnik Elvedin Grečić, koji je izvjestio zastupnike da odustaje od dijela amandmana, jedan koji se odnosi na član 3 B, ostali amandmani su usaglašeni sa predlagačem.

Tomislav Martinović je ispred predlagača Zakona izvjestio Skupštinu HNK o izjašnjenju na predložene amandmane i to:

Amandmani Kluba poslanika SDA:

Amandman I se djelomično prihvća na način da se u članu 3a. dodaje novi stav 6 koji glasi:

„Turistička zajednica Hercegovačko-neretvanskog kantona i novoosnovane turističke zajednice općina i gradova međusobnim sporazumom mogu regulisati pitanje radno pravnih odnosa uposlenika.,,

Klub poslanika SDA je odustao od dijela amandmana koji se odnosi na član 3b.

Amandman II se prihvća na način da se dodaje član 5a. koji glasi:

U članu 9. stav 4. mijenja se i glasi:

Turistička zajednica Hercegovačko-neretvanskog kantona donosi Statut uz prethodnu saglasnost Ministarstva. Statuti općinskih/gradskih turističkih zajednica donose se uz prethodnu suglasnost općinskih/gradskih vijeća.

Amandman III se prihvća na način da se dodaje član 5b. koji glasi:

U članu 11. stav 3. mijenja se i glasi:

Prava članova turističke zajednice u upravljanju turističkom zajednicom utvrđuju se Statutom turističke zajednice.

Amandman IV se ne prihvća.

Amandman V se djelomično prihvća na način da se dodaje novi člana 6a koji glasi:

U članu 25. dodaje se novi stav 2. koji glasi:

Obaveznim članom Turističke zajednice HNK postaje svaka pravna i fizička osoba koja na području Kantona ima svoje sjedište ili podružnicu, pogon, filijalu i sl. (u daljem tekstu: poslovna jedinca), a koja ostvaruje prihod obavljanjem ugostiteljskih i turističkih te s turizmom neposredno povezanih djelatnosti.

Amandman VI se prihvaća na način da se dodaje član 6b. koji glasi:

Član 27. stav 1. mijenja se i glasi:

Skupštinu Turističke zajednice HNK čine predstavnici članova turističke zajednice iz člana 6a. ovog Zakona. Broj predstavnika članova se utvrđuje Statutom, tako da je svaka turistička zajednica općine i grada zastupljena sa najmanje jednim predstavnikom. Veći broj predstavnika pojedinačne općine i grada ovisi o turističkom značaju područja za koje je osnovana, a određuje se srazmjerno udjelu općinskih i gradskih turističkih zajednica u ukupnom prihodu Turističke zajednice HNK.

Amandman VII se ne prihvaća.

Amandman VIII se prihvaća na način da se član 8. mijenja i glasi:

„Odredbe podzakonskih akata uskladiti će se sa odredbama ovog Zakona u roku od 60 dana od dana stupanja na snagu ovog Zakona.“

Amandman poslanika Amira Šele nije prihvaćen.

Amandman predlagača Zakona se prihvaća na način da se dodaje član 6c. koji glasi:

U članu 37. stav 1. dodaje se nova tačka 13. koja glasi:

„13. propisivanje izgleda, sadržaja i zaštite autohtonog izvornog suvenira,“
Dosadašnja tačka 13. postaje tačka 14.

Šerif Špago je konstatovao da su amandmani koji su prihvaćeni postali sastavni dio ovog Zakona.

Obavljeno je glasanje o Prijedlogu Zakona o izmjenama i dopunama Zakona o turističkim zajednicama i unaprjeđenju turizma u HNK-a uz amandmane i tehničke ispravke koje su predlagači ovog Zakona prihvatili.

Nakon glasanja konstatovano je da je Zakon jednoglasno usvojen.

AD 4. Nacrt Zakona o izmjenama i dopunama Zakona o porezu na promet nekretnina HNK-a (predlagač Amir Šelo)

Obrazloženje je dao Amir Šelo, zastupnik u Skupštini HNK i predlagač ovog Zakona.

Ispred Komisije za zakonodavno-pravna pitanja obrazloženje je dao Tomislav Martinović:

1. Postoji ustavni osnov za donošenje Zakona o izmjenama i dopunama Zakona o porezu na promet nekretnina Hercegovačko-neretvanskog kantona.
2. Komisija za zakonodavno-pravna pitanja konstatirala je da su samo dvije jedinice lokalne samouprave dale svoja mišljenja, da ne postoji procjena finansijskih učinaka ovog Zakona, te smo mišljenja da Skupština HNK može razmatrati spomenuti Zakon isključivo u formi nacrtu.
3. Komisija za zakonodavno-pravna pitanja konstatira da su odredbe ovog Zakona već bile u skupštinskoj proceduri, te da su iste bile u postupku izmjena i dopuna.

Otvorena je rasprava:

U raspravi su učestvovali: Julineta Jurić, Aner Žuljević, Slaven Raguž, Đuro Prkačin, Elvedin Grcić, Stana Burić, Amir Šelo i Šerif Špago.

Predsjedavajući Skupštine HNK Šerif Špago predložio je slijedeći zaključak:

- 1) **Prihvata se Nacrt Zakona o izmjenama i dopunama Zakona o porezu na promet nekretnina u HNK-a kao dobra osnova za izradu prijedloga zakona;**
- 2) **Primjedbe, prijedlozi i mišljenja na Nacrt zakona o izmjenama i dopunama Zakona o porezu na promet nekretnina u HNK-a iznijeti na sjednici Skupštine HNK-a dostavit će se predlagaču;**
- 3) **Poslanicima se ostavlja rok od 15 dana da u pisanom obliku dostave dodatne primjedbe i prijedloge na Nacrt Zakona o izmjenama i dopunama Zakona o porezu na promet nekretnina u HNK-a;**
- 4) **Zadužuje se predlagač da u roku od 30 dana organizuje javnu raspravu o nacrtu zakona i dostavi izvještaj Skupštini HNK-a;**
- 5) **Zaključak stupa na snagu danom donošenja i objavit će se u Službenim novinama HNK-a.**

Obavljeno je glasanje o navedenom zaključku.

Nakon glasanja konstatovano je da je zaključak o prihvatanju Nacrta Zakona o izmjenama i dopunama Zakona o porezu na promet nekretnina u HNK-a, usvojen jednoglasno.

AD 5. Nacrt Zakona o izmjenama i dopunama Zakona o bibliotekarskoj djelatnosti HNK (predlagač Julineta Jurić)

Obrazloženje je dala Julineta Jurić, zastupnica u Skupštini HNK i predlagač ovog Zakona.

Ispred Komisije za zakonodavno-pravna pitanja obrazloženje je dao Tomislav Martinović:

1. Postoji ustavni osnov za donošenje Zakona o Izmenama i dopunama Zakona o bibliotekarskoj djelatnosti Hercegovačko-neretvanskog kantona.
2. Komisija za zakonodavno-pravna pitanja je mišljenja da Skupština HNK može razmatrati spomenuti Zakon isključivo u formi nacrta.
3. Komisija za zakonodavno-pravna pitanja konstatira da su odredbe ovog Zakona već bile u skupštinskoj proceduri, te da su iste bile u postupku izmjena i dopuna.

Otvorena je rasprava.

U raspravi su učestvovali: Vesna Saradžić, Elvedin Grcić, Julineta Jurić i Šerif Špago.

Predsjedavajući Skupštine HNK Šerif Špago predložio je slijedeći zaključak:

- 1) **Prihvata se Nacrt Zakona o izmjenama i dopunama Zakona o bibliotekarskoj djelatnosti u HNK-a kao dobra osnova za izradu prijedloga zakona;**
- 2) **Primjedbe, prijedlozi i mišljenja na Nacrt Zakona o izmjenama i dopunama Zakona o bibliotekarskoj djelatnosti iznijeti na sjednici Skupštine dostavit će se predlagaču;**
- 3) **Poslasticima se ostavlja rok od 15 dana da u pisanom obliku dostave dodatne prijedloge na Nacrt zakona o izmjenama i dopunama Zakona o bibliotekarskoj djelatnosti;**
- 4) **Zaključak stupa na snagu danom donošenja i objavit će se u Službenim novinama HNK-a.**

Obavljeno je glasanje o navedenom zaključku.

Nakon glasanja konstatovano je da je zaključak o prihvatanju Nacrta Zakona o izmjenama i dopunama Zakona o bibliotekarskoj djelatnosti HNK, usvojen jednoglasno.

AD 6. Prijedlog Strategije ruralnog razvoja HNK-a za period 2021. - 2027. godina

Obrazloženje su dali: Donko Jović ministar poljoprivrede, šumarstva i vodoprivrede u Vladi HNK, prof. Elma Temim dekanica Agromediteranskog fakulteta u Mostaru i profesor Damir Jerković.

Otvorena je rasprava.

U raspravi su učestvovali: Aner Žuljević, Đuro Prkačin, Amir Šelo, Slavko Bilić, Stana Burić, Tomislav Martinović, Šerif Špago i ministar Donko Jović.

Obavljeno je glasanje o Prijedlogu Strategije ruralnog razvoja HNK-a za period 2021. - 2027. godina.

Nakon glasanja konstatovano je da je Prijedlog Strategije ruralnog razvoja HNK-a za period 2021. - 2027. godina jednoglasno usvojen.

Predsjedavajući Špago je zatražio da se prije objave u Službenim novinama HNK, Strategija ruralnog razvoja pripremi na svim službenim jezicima u HNK.

AD 7. Prijedlog zaključaka o stanju u zdravstvu u HNK-a i realizaciji zaključaka Skupštine HNK-a od 15.12.2015. godine

Obrazloženje je dao Šerif Špago koji je izvjestio zastupnike da je Kolegij Skupštine HNK uz konsultacije sa ministrima Opsenicom i Faladžićem utvrdio slijedeće zaključke:

1. Skupština Hercegovačko-neretvanskog kantona odaje priznanje zdravstvenim radnicima koji su u prethodnom periodu izuzetnim naporima doprinijeli da se pandemija korona virusa stavi pod kontrolu.
2. Skupština Hercegovačko-neretvanskog kantona konstatuje da ranije doneseni Zaključci Skupštine koji definišu poslovanje i zapošljavanje nisu u potpunosti ispoštovani. Zadužuje se Vlada HNK da u roku od 90 dana utvrdi usklađenost Pravilnika o unutrašnjoj organizaciji i sistematizaciji radnih mjesta javnih zdravstvenih ustanova kojima je osnivač ili suosnivač Hercegovačko-neretvanski kanton sa važećim standardima i normativima iz obaveznog zdravstvenog osiguranja u Federaciji BiH i preduzme odgovarajuće aktivnosti.
Pozivamo jedinice lokalne samouprave u Kantonu da u javnim zdravstvenim ustanovama čiji su osnivači također utvrde usklađenost Pravilnika o unutrašnjoj organizaciji i sistematizaciji radnih mjesta sa važećim standardima i normativima iz obaveznog zdravstvenog osiguranja u Federaciji BiH.
3. Skupština Hercegovačko-neretvanskog kantona konstatuje da je u Budžetu HNK za 2021. godinu za domove zdravlja u HNK bilo planirano 2 miliona KM, a da je izmjenama i dopunama Budžeta za 2021. godinu dodatno izdvojeno 1,3 miliona KM. Budžetom HNK za 2022. godinu planirano je izdvajanje za domove zdravlja iznos od 3 miliona KM.
Konstatujemo da sredstva koja izdvajaju jedinice lokalne samouprave za domove zdravlja su nedovoljna.
Skupština Hercegovačko-neretvanskog kantona poziva jedinice lokalne samouprave da u skladu sa Zakonom o zdravstvenoj zaštiti Federacije Bosne i Hercegovine osiguraju dodatna finansijska sredstva za rad zdravstvenih ustanova čiji su osnivači.
4. Zadužuje se Zavod zdravstvenog osiguranja HNK da u roku od 30 dana dostavi kriterije i podatke, po kojima su zaključeni ugovori za finansiranje svih zdravstvenih ustanova u 2022. godini.
5. Skupština HNK poziva Vladu i Parlament Federacije BiH da okonča proceduru donošenja Zakona o finansijskoj konsolidaciji i restrukturiranju javnih zdravstvenih ustanova F BiH. Zadužuje se Vlada HNK i jedinice lokalne samouprave da nakon stupanja na snagu Zakona o finansijskoj konsolidaciji javnih zdravstvenih ustanova u Federaciji Bosne i Hercegovine pripreme propise iz svoje nadležnosti u cilju finansijske konsolidacije zdravstvenih ustanova koje nisu obuhvaćene spomenutim propisom.
6. Zadužuje se Vlada HNK da izradi Strategiju razvoja zdravstva u HNK za period do 2027. godine.

Otvorena je rasprava.

U raspravi su učestvovali: Vesna Saradžić, Aner Žuljević i Šerif Špago.

Obavljeno je glasanje o navedenim zaključcima.

Većinom glasova „Za“, uz 1 glas „Protiv“ i 1 „Suzdržan“ glas usvojeni su navedeni zaključci.

AD 8. Informacija Ministarstva privrede o realizaciji zaključenih ugovora o koncesijama za 2020. godinu

Obrazloženje je dao Željko Laketić, ministar privrede u Vladi HNK.

Otvorena je rasprava.

U raspravi nije nitko učestvovao.

Predsjedavajući Skupštine HNK konstatovao je da je Informacija Ministarstva privrede o realizaciji zaključenih ugovora o koncesijama za 2020. godinu primljena k znanju.

AD 9. Informacija Ministarstva poljoprivrede, šumarstva i vodoprivrede o realizaciji dodijeljenih koncesija i ugovora o zakupu za korištenje poljoprivrednog zemljišta u državnom vlasništvu na području HNK-a, zaključno sa 31.12.2020. godine

Obrazloženje je dao Donko Jović, ministar poljoprivrede, šumarstva i vodoprivrede u Vladi HNK.

Otvorena je rasprava.

U raspravi nije nitko učestvovao.

Predsjedavajući Skupštine HNK konstatovao je da je Informacija Ministarstva poljoprivrede, šumarstva i vodoprivrede o realizaciji dodijeljenih koncesija i ugovora o zakupu za korištenje poljoprivrednog zemljišta u državnom vlasništvu na području HNK-a, zaključno sa 31.12.2020. godine primljena k znanju.

AD 10. Informacija Ministarstva poljoprivrede, šumarstva i vodoprivrede o realizaciji potpisanih ugovora o koncesijama iz oblasti vodoprivrede, zaključno sa 31.12.2020. godine

Obrazloženje je dao Donko Jović, ministar poljoprivrede, šumarstva i vodoprivrede u Vladi HNK.

Otvorena je rasprava.

U raspravi su učestvovali: Amir Šelo, Elvedin Grcić, ministar Donko Jović i Šerif Špago.

Predsjedavajući Skupštine HNK konstatovao je da je Informacija Ministarstva poljoprivrede, šumarstva i vodoprivrede o realizaciji potpisanih ugovora o koncesijama iz oblasti vodoprivrede, zaključno sa 31.12.2020. godine primljena k znanju.

**AD 11. Odluka o potvrđivanju imenovanja kantonalnog javnog pravobranioca HNK-a;
AD 12. Odluka o potvrđivanju imenovanja zamjenika kantonalnog javnog pravobranioca
u kantonalnom javnom pravobranilaštvu HNK-a**

Obrazloženje je dao Suad Balić ministar pravosuđa, uprave i lokalne samouprave u Vladi HNK.

Otvorena je rasprava.

U raspravi nije nitko učestvovao.

Obavljeno je glasanje o Odluci o potvrđivanju imenovanja kantonalnog javnog pravobranioca HNK-a.

Nakon glasanja konstatovano je da je Odluka o potvrđivanju imenovanja kantonalnog javnog pravobranioca HNK-a jednoglasno usvojena.

Otvorena je rasprava vezana za potvrđivanje Odluke o potvrđivanju imenovanja zamjenika kantonalnog javnog pravobranioca u kantonalnom javnom pravobranilaštvu HNK-a, u imenu Emira Elezovića.

U raspravi nije nitko učestvovao.

Obavljeno je glasanje o potvrđivanju imenovanja zamjenika kantonalnog javnog pravobranioca u kantonalnom javnom pravobranilaštvu HNK-a.

Nakon glasanja konstatovano je da je Odluka o potvrđivanju imenovanja zamjenika kantonalnog javnog pravobranioca u kantonalnom javnom pravobranilaštvu HNK-a jednoglasno usvojena.

Sjednica je završena u 17:30 sati.

Zapisničar
Dario Topić

Predsjedavajući
Šerif Špago